

17.07.2026

UKA2026/382

Matumuuna Inatsisartut Suleriaasianni § 33 naapertorlugu aalajangiiffigisassatut siunnersuut manna saqqummiunneqarpoq:

Naalakkersuisut kingusinnerpaamik UPA2027 ulluinnarni pisariaqartitanik pissarsisinnaaneq pitsanngorsarlugu, Kalaallit Nunaannilu imminut pilersorsinnaaneq siuarsarlugu iliuusissatut pilersaarummik saqqummiussinissamik peqquneqarnissaat pillugu Inatsisartut aalajangiiffigisassaattut siunnersuut. Pilersaarummi ulluinnarni pisariaqartitanik kiisalu aalisarnermut, aallaaniarnermut piniarnermullu atortunik pissarsisinnaanerp pitsanngorsarnissaanut suliniutit anguniakkallu aalajangersimasut ilanngunneqassapput.

(Inatsisartunut ilaasortaq Juno Berthelsen, Naleraq)

Tunngavilersuut

Ukiuni makkunani nerisassat ulluinnarnilu pisariaqartitat allat akii qaffakkiartuinnarput.

Tamanna nuna tamakkerlugu malugineqarpoq. Ilaqutariit isertitakitsut, kisimiillutik pilersuisut, soraarnerussutisiallit nunaqarfinni isorliunerusunilu innuttaasut immikkut eqqugaapput. Sumiiffinnimi taakkunani nioqqutissat amerlanertigut akisunerusarput.

Akit qaffakkiartornerat pissutigalugu inuuniarneq ajornarnerulersimavoq. Aamma imminut pilersorsinnaaneq ajornarnerulersittarpaa. Aalisarneq, piniarneq aallaaniarnerlu ilaqutariinnut amerlasuunut sulii pingaaruteqarput. Inuussutissanik pilersueqataapput. Aamma kulturitsinnut najukkamilu aningaasaqarnermut pingaaruteqarput.

Aalisarnermut, piniarnermut aallaaniarnermullu atortut aamma akisupput. Atortut akisuallaarpata pinngortitap pisuussutaanik atuinnissaq ajornanerulertarpoq. Taamaalilluta nioqqutissanik avataanit eqqussukkanik pisariaqartitsinerulertarpugut.

Naleraq ukiuni arlalinni nuna tamakkerlugu innuttaasut inuuniarnikkut atugaasa pitsaanerulernissaat anguniarlugu sulisimavoq. Inuit sumi najugaqaralarunilluunniit pitsaasumik inuusinnaasariaqarput. Nunarsuarmi akit aqussinnaanngilagut. Kisianni nammineq pilersuinerput nukittorsarsinnaavarput. Aamma nammineq pisuussutitsinnik atuinnissamut periarfissat pitsaanerulersissinnaavagut.

Taamaattumik ataatsimoortumik iliuusissatut pilersaarusiortoqarnissaa siunnersuutigaa. Pilersaarummi periarfissat aalajangersimasut qulaajarneqassapput. Aaqqiissutissat maanna aalajangersareernissaat siunertaanngilaq. Pilersaarummi ilaatigut makku qulaajarneqassapput:

- Inuussutissat akiisa qaffannerisa kingunerisai qanoq annikillisinneqarsinnaanersut
- Ulluinnarni pisariaqartitanik nuna tamakkerlugu pissarsisinnaaneq qanoq pitsanngorsarneqarsinnaanersoq

- Aalisarnermut, aallaaniarnermut piniarnermullu atortunik pissarsisinnaaneq qanoq pitsaanerulersinneqarsinnaanersoq
- Najukkani imminut pilersorsinnaaneq qanoq nukittorsarneqarsinnaanersoq nioqqutissallu avataanit eqqussukkat qanoq ikilisinneqarsinnaanersut
- Suliniutit ataasiakkaat nunatta karsianut qanoq akeqassanersut

Pisortanut aningaasaqarnikkut allaffissornikkullu kingunerisassat

Suliaq AC-fuldmægtigip ukiup affaanit ukioq ilivitsumut sulineranut, 250.000-500.000 kr.-inik naleqartumut, naapertuuttumik allaffissornikkut nukinnik pisariaqartitsissasoq nalilerneqarpoq.

Siunnersuut nammineq suliniutinut nutaanut aningaasartuuteqanngilaq. Suliniutit nutaat kingusinnerusukkat Inatsisartunut saqqummiunneqassapput.

Inuussutissarsiortunut aningaasaqarnikkut allaffissornikkullu kingunerisassat

Siunnersuut inuussutissarsiortunut toqqaannartumik aningaasaqarnikkut allaffissornikkulluunniit kinguneqanngilaq.

Siunissami suliniutit najukkani tunisassiortunik, aalisartunik, piniartunik inuussutissarsiortunillu allanik nukittorsaasinnaapput.

Innuttaasunut aningaasaqarnikkut allaffissornikkullu kingunerisassat

Siunnersuut innuttaasunut toqqaannartumik kinguneqanngilaq. Siunertaq tassaavog suliniutinut siunissami ulluinnarni pisariaqartitanik pissarsisinnaanermik pitsanngorsaasinnaasunut imminut pilersorsinnaanermillu nukittorsaasinnaasunut tunngavissiiinissaq.